



## Yesu Athibitishiwa Kuhusu

### Uana Wake

**I**kawa, watu wote walipokwisha kubatizwa, na Yesu naye amebatizwa, naye anaomba, mbingu zilifunuka. —**Luka 3:21.**

Wakati Yesu alipokuja kubatizwa, Yohana alitambua ndani Yake usafi wa tabia ambao hakuwahi kuuona kwa mwanadamu mwingine yeyote. Mazingira tu ya kuwepo Kwake yalikuwa na utakatifu na kicho. Kati ya makundi mengi yaliyokusanyika kando ya Yordani, Yohana alikuwa amesikia hadithi za uovu za uhalifu, na alikuwa amekutana na nafsi zilizolemewa na mizigo ya dhambi nyingi; lakini kamwe hakuwahi kukutana na mwanadamu aliyekuwa na mvuto mtakatifu kiasi hicho. Yote haya yalikuwa yakipelekana na kile kilichofunuliwa kwa Yohana kuhusu Masihi.

Yesu hakupokea ubatizo kama ungamo la hatia iliyomhusu Yeye mwenyewe. Alijiweka mahali pa wenye dhambi, akichukua hatua tunazopaswa kuchukua, na kufanya yale tunayopaswa kufanya. Maisha Yake ya mateso na ustahimilivu wenye subira baada ya ubatizo pia yalikuwa mfano kwetu. Alipotoka kwenye maji, Yesu aliinamisha kichwa na kuomba kwenye ukingo wa mto. Kipindi kipya na muhimu kilikuwa kikifunguliwa mbele Yake.

Malaika walikuwa hawajawahi kusikia ombi kama hilo. Walikuwa na hamu ya kumfikishia Mkombozi anayesali ujumbe wa uhakikisho na upendo. Lakini hapana; Baba Mwenyewe alimhudumia Mwanawe. Moja kwa moja kutoka kwenye kiti cha enzi kulitoka nuru ya utukufu wa Mungu. Mbingu zilifunguka, na miale ya mwanga na utukufu ilitoka huko na kuchukua umbo la njiwa, lenye mwonekano wa dhahabu iliyong'arishwa. Umbo la njiwa lilikuwa ishara ya upole na unyenyekevu wa Kristo.

Watu walisimama wakiwa wameshikwa na hofu na mshangao. Macho yao yalikuwa yameelekezwa kwa Kristo, ambaye umbo Lake la unyenyekevu lilikuwa limefunikwa na mwanga mzuri na utukufu ambao daima huzunguka kiti cha enzi cha Mungu. Uso Wake uliokuwa umeelekezwa juu ulionekana kuangazwa kama ambavyo hawajawahi kuuona uso wa mwanadamu kabla. Radi zilitanda na umeme ukamulika kutoka mbingu zilizofunguka, na sauti ilikuja kutoka huko kwa uadhama wa kutisha, ikisema, "Huyu ni Mwanangu, mpendwa wangu, ninayependezwa naye"....Sauti ya Yehova ilimhakikishia Kristo Yeye ni Mwana Wake Aliye wa milele (Youth's Instructor, Machi 1, 1874).

Utukufu uliokuwa juu ya Kristo ni ahadi ya upendo wa Mungu kwetu. Unatufundisha juu ya nguvu ya maombi—jinsi sauti ya mwanadamu inavyoweza kufikia sikio la Mungu, na maombi yetu kupokelewa katika nyua za mbinguni. Mwanga uliomshukia kutoka kwenye malango yaliyofunguka juu ya kichwa cha Mwokozi wetu **utatushukia** sisi tunapoomba msaada wa kushinda majaribu. Sauti iliyozungumza na Yesu inasema kwa kila nafsi inayoamini, Huyu ni Mwanangu, mpendwa wangu, ninayependezwa Naye (The Desire of Ages, 113).